

Den Parlamento:

Ministro no por a duna informacion riba venta di Interbank

ORANJESTAD (AAN)
Ayer oposicion a haci den parlamento pregunta na gobierno encunto con e venta di Interbank a tuma lugar, pero straño cu e por zona gobierno no por a duna contesta riba preguntanan encunto con e venta di Interbank a tuma lugar.

Fraccion di AVP a haci ministro Marisol pregunta riba e caso di Interbank pasobra Interbank a worde cumpra door di FCCA y FCCA ta un fundacion di gobierno.

Tur loke ta di gobierno ta propiedad di pueblo aunke cu cierto mandatarionan ta kere cu nan ta un sorto di doño di loke ta cay bao di gobierno.

Ministro no por a duna informacion riba e proceso di venta di Interbank siendo cu pueblo mester haya sa cuanto placa tabata tin envólvi den e venta di Interbank y mas importante ainda cuanto debe pais Aruba a keda tras cune ora cu Interbank a worde bendi.

Manera DIARIO a trece pa dilanti cu documentonan encunto e venta di Interbank ta bon scondi den kluis pa ningun hende haya informacion exacto con un ke otro a tuma lugar y cuanto placa ainda pueblo pagador di belasting tin cu para responsabel pe pa e venta di Interbank.

Mirando cu Interbank tabata propiedad di pueblo y esaki a worde bendi sin cu

parlamento a worde bon informa y consulta debidamente riba dje no tabata nada straño cu ayera porfin algun parlamentario di oposicion a cuminsa haci pregunta encunto kico a worde haci cu placa di pueblo.

Tabata masha straño mes cu ministro no por a duna informacion riba preguntanan haci den parlamento pasobra ora cu e organo mas halto di nos pais haci pregunta riba asuntonan cu ta regarda propiedad di pueblo, tanto ministro como gobierno den su totalidad, tin e deber y mas importante ainda, nan tin e responsabilidad y obligacion pa suministra parlamento cu informacion.

Ta kico tin di sconde cu gobierno no por a duna informacion na parlamento encunto e venta di Interbank?

Mirando cu atrobe pueblo no

ta haya ni informacion ni claridad encunto asuntonan cu ta regarda interes nacional y cu parlamento ta mas bien un circo pa complace gobierno, no ta keda nada otro cu pueblo tin cu bay depende di e seccion di investigacion di DIARIO pa saca e berdad pa dilanti.

Ni cuanto nan sconde documentonan den kluis, tardi of tempran DIARIO lo haya nan y kico ta pasa e ora ey atrobe?

Ora e berdad sali den publicidad ta mesora esnan cu a trata na tapa e berdad lo core bay grita yora y bira onsportief y bisa cu cierto

periodistanan ta contra gobierno, mientras nan no ta bisa pueblo cu tempo nan tabata den oposicion nan mes tabata manda monton di documento pa prensa en general riba asuntonan cu e gobierno anterior no tabata haci bon.

Keda pendiente!

Eleccion den año 2005

Dia 1 di Augustus pa 9 di September proximo partidonan politico tin cu entrega nan lista

ORANJESTAD (AAN) – Minister Presidente, señor Nelson Oduber, a splica den conferencia di prensa diarazon, cu e Aña Parlamentario pa e miembronan di Parlamento cu a ser elegi na 2001, ta caba dia 29 di October 2005 mientras cu e Staten nobo cu pueblo Arubano ta bay elegi dia 29 di September proximo lo mester bin hunto dia 30 di


October 2005.

Esaki ta nifica cu e presentacion di candidatonan mester tuma lugar nobenta dia prome cu fin di e periodo di Staten, esta prome cu dia 29 di October venidero, manera ta regla den e "Kiesverordering" of ley di sufragio, den su articulo 15. E mandatario a agrega cu tin un margen pa entrega e lista di partidonan cu ta bay competi den eleccion.

Entrega di lista mester ta entre dia 31 di Juli pa 10 di September proximo.

"Pues, cu otro palabra, den e periodo di 1 di Augustus pa 9 di September 2005 tin e posibilidad pa e partidonan politico entrega nan lista pa participa den eleccion. E fecha di eleccion lo ta entre dia 19 pa 29 di September, manera ley ta stipula", e mandatario a comenta.

KICO TIN DI SCONDE?!!



BEST DEAL

Tel: 5827100

(Pariba di Aruba Bank, Paradera)

BEST SHOPPING DEAL

Turibana Plaza

Tel: 5865455

